

Serie Kutunga Luzingu ya Mbote na Nzila ya Bible

KUZENGA MBOTE INKI NGE FWETI SALA, KUKANGAMA KAKA NA YO

Baleso zole:

1. Histoire ya Kuwakana ya Ntama: Leso ya Nehemia
2. Histoire ya Kuwakana ya Mpa: Leso ya Ntumwa Paulo kwendaka na Yerusalemi

Disongidila:

Kuzenga mbote inki nge fweti sala, ebuna kuvanda na ntima fixe ya kulanda kusala konso ntangu, kukangama na yo, kulungisa yina nge me sila. Kulanda kusala yo kaka, ata yo ke mpasi kusala, sambu nge me zenga na ntima nde nge fweti sala yo. français: engagement.

(Contraire) Kuzenga nswalu to kusala kukonda kuyindula

Kuzenga nswalu kele kuyindula mingi ve, kansi kusala konso yina ntima na nge yindula kusala na minute yina, kukonda kuyindula mambu ya fweti landa, mpi kukonda kubambuka inki nge me dezia silaka kusala. Kusala kukonda kuyindula. français: impulsif, irrefléchi.

Verse kulonguka (sambu na baleso yonso zole):

Galatia 6:9 "Beto lembe ve na kusala mambu ya mbote. Sambu, kana beto ke sala kaka, beto ta katula bambuma na ntangu ya mbote."

Longa verse ya Bible mutindu yai:

Groupe 1: (Na mpila ritimika) KUZENGA MBOTE, KUKANGAMA NA YO

Groupe 2: Beto lembe ve na kusala mambu ya mbote.

Groupe 1: KUZENGA MBOTE, KUKANGAMA NA YO

Groupe 2: Sambu, kana beto ke sala kaka,

Groupe 1: KUZENGA MBOTE, KUKANGAMA NA YO

Groupe 2: beto ta katula bambuma na ntangu ya mbote.

(Na nima, balula bagroupe. Groupe 1 kuma Groupe 2, ti Groupe 2 ti Groupe 1. Tuba yo diaka.

Histoire ya Kuwakana ya Ntama:

Nehemiah zengaka nde yandi fweti tunga lupangu ya Yerusalemi ya me bwaka, ebuna Yandi lungisaka yina ya yandi me zenga kusala.

Leso ya Bible: Nehemia 1: 2 tii na 6:15 (Ndambu beto ta tanga, ndambu beto ta baka mabanza ya nene na kati na yo.)

Kikuma ya Leso:

Nehemia zengaka na ntima nde yandi fweti kutunga diaka lupangu ya bwala Yerusalemi ya me bwaka. Ebuna, ata bampasi vandaka mingi, yandi landaka kaka kusala yo, tii ntangu yandi lungisaka yina ya yandi silaka—kutunga yo yonso diaka. Bana ta zenga kulanda mbandu ya Nehemia. Bo ta yindula mbote inki bo fweti sala, ti bo ta sila kusala bisalu ya kele mbote, ya ke sadisa bantu ti ya ke pesa Nzambi lukumu. Kana bo me zenga ti bo me sila, ebuna bo mpi ta lungisa kusala, ti bo ta kangama na yo. Bo ta landa kaka tii ntangu bo ta manisa inki ya bo yantikaka kusala.

Kuyantika Leso:

Kana nge kwikila nde Nzambi zola nge kusila kusala kosalu mosi, ebuna nge yindula mbote ti nge zenga to sila kusala yo, inki mambu lenda kanga nge nzila kusala yo? Bampasi ikwa nge fweti mona na ntwala nge ta kanga kosalu yina? Kana bampasi kuvanda mingi, mpasi kaka kulanda mpasi, inki nge ta sala?

Inki nge ta sala kana bantu seka nge ti saula nge sambu nge me zenga to me sila kusala mambu mosi? Keti yo ta vanda mbote kukanga kusala ntangu yina?

Inki nge ta sala kana kosalu yina kuvanda mpasi ya mingi diaka? Nge ta bika kusala ntangu yina?

Inki nge ta sala kana kosalu yina kuvanda ya kingonsa? Nge ta bika kusala ntangu yina?

Na mukanda ya Nehemia na Kuwakana ya Ntama, beto mona muntu ya silaka kusala kosalu mosi ya mfunu sambu na dikanda na yandi. Zina na yandi vandaka Nehemia, ti mukanda mosi ya Bible ikele na zina na yandi mpi—mukanda ya Nehemia na Kuwakana ya Ntama.

Bampasi yai yonso ya beto me tuba, yo yonso kwisilaka Nehemia. Yandi monaka bampukumunu mingi kuzenga nswalu kukonda kuyindula mbote. Kansi yandi yindulaka mbote, ebuna yandi zengaka kusala mambu mosi ya mbote, mambu mosi ya Nzambi zolaka yandi kusala. Ntangu yai, beto tala histoire na yandi. Beto ta mona kana yandi landaka ti kana yandi manisaka kosalu ya yandi silaka kusala.

Mambu ya nene na Leso Yai na Bandambu 3:

(Longi, NB! Histoire kele nda, ebuna bitini ya nkaka nge ta sommariser kaka. Nge ta tanga baverse kibeni ya Bible kaka na bisika ya yo tuba “Kutanga.”)

1. Lupangu ya bwala Yerusalemi me bwaka. Nehemia yindulaka mbote, ebuna yandi silaka kutunga yo diaka.

1.1 Nehemia waka nde lupangu ya bwala Yerusalemi me bwa. Nehemia 1: 2-3

Kutanga: . . . *Bo songaka mono mpi nde bibaka ya Yeruzalemi kele kaka ya kubwa, bakielo ya lupangu mpi bo me yidika yo ntete ve. . .(Nehemia 1:3)*

Kuyula:

- Inki vandaka ya kubwa?
(Bibaka ya bwala Yeruzalemi)
- Bo me yidika inki ntete ve?
(Bakielo ya lupangu ya bwala Yerusalemi)

1.2 Nehemia dilaka ti sambaka Nzambi kukonda kudia. Yandi ndimaka masumu na yandi ti ya dikanda na yandi. Nehemia 1:4-10

Kutanga:

Ntangu mono waka mambu yai, mono vandaka na ntoto mono dila. Bilumbu mingi mono vandaka kudia ve. Mono vandaka kusamba Nzambi nde: (Nehemia 1:4)

Kuyula:

- Ntangu Nehemia waka nde bibaka ya Yeruzalemi vandaka kaka ya kubwa, inki vandaka mvutu na yandi? Yandi salala inki?
(Yandi bwaka na ntoto ti yantikaka kudila.)
- Sambu na inki yandi kudiaka ve?
(Sambu na kusamba Nzambi)
- Yandi sambaka Nzambi kukonda kudia ntangu ikwa?
(Bilumbu mingi.)

1.3 Nehemia kuzwaka kiyeka ya Mfumu ya Babilone kubika kisalu na yandi sambu na kukwenda na Yeruzalemi kutanga diaka lupangu. Nehemia 1: 11-2:8

1.4 Nehemia kumaka na Yeruselemi, ebuna yandi zikisaka bwala vanda inki mutindu.

Nehemia 2: 11-15

Kutanga:

Mono kwendaka tii na Yeruselemi , mono vandaka kuna bilumbu tatu.

Nehemia 2:11 . . . mono vandaka kutala bibaka ya lupangu yina me bwaka ti bakielo yina me piaka tiya. Nehemiah 2:13b

Kuyula:

- Ntangu Nehemia kwisaka na Yeruselemi, bilumbu ikwa na ntwala yandi kwendaka kutala bikaka yina?
(Bilumbu tatu kaka)

1.5 Nehemiah bendaka Bayuda kusila kusadisa na kisalu yina, ti bo ndimaka.

Nehemia 2:17-18

Kutanga:

Kansi ntangu yai mono tubilaka bo nde: “Beno me mona mpasi ya beto ke na yo, sambu bwala Yeruselemi kele ya kubeba, bakielo ya lupangu na yo kele ya kufwa. Beto tungeno bibaka ya bwala sambu na kumanisa nsoni na beto. Nehemia 2:17 . . .Bo tubaka nde: “Beto yantika kisalu ya kutunga diaka bwala!” Ebuna bo yilamaka na kuyantika kisalu.” Nehemia 2:18b

Kuyula:

- Nehemia songaka bo nde bo sala inki?
(Beto tungeno bibaka ya bwala.)
- Yandi songaka bo nde kutungeno bibaka ya bwala, yo ta sala inki?
(Yo ta manisa nsoni na bo.)
- Inki vandaka mvutu na bo?
(Bo vutulaka nde, “Beto yantikaka kisalu ya kutunga diaka bwala!”)
- Bo yilamaka kusala inki?
(Kuyantika kisalu.)

Bana Kutuba: (Repetitio Ritimika): Nehemia zengaka kutunga lupangu ya bwala.

2. Nehemia landaka kusalu ata bambeni nwanisaka yandi ngolo, ata discouragement ti kingonsa vandaka mingi.

2.1 Bambeni sekaka Nehemia ti mengaka yandi. Nehemia 2:19

2.2 Bo waka makasi, ti bo bendaka bantu ya nkaka kunwanisa bo mpi. Nehemia 4:1-2.

Kutanga: 4:1 . . . ntangu bo waka nde beto ke tula ngolo na kutunga diaka lupangu ya Yeruzalemi ti kukangisa mabulu ya bikaka, bo waka makasi mingi.
2 Ebuna bo yonso wakanaka na kwisa kunwanisa Yeruzalemi ti kutula mavanga,

Yula:

- *Sambu na inki bambeni wilaka bo makasi?
(Sambu bo waka nde baYuda vandaka kutunga bibaka ya lupangu ya bwala.)*
- *Bambeni zengaka kusala inki?
(Kunwanisa bo ti kutula mavanga.)*

2.3 Ata bambeni salaka yonso, Nehemia sambaka Nzambi, yandi tulaka basentinel, bo yimbaka, ti yandi landaka kusalu na mpila yandi me sila. Nehemia 4: 3-6

Kutanga: 3 kansi beto, beto sambaka Nzambi na beto, beto tulaka bantu na kutalaka bo mpimpa ti mwini.
4 Bantu ya Yuda vandaka na nkunga ya bo vandaka kuyimba. . .
5 Bambeni na beto vandaka kuyindula nde beto ta mona bo ve, beto ta zaba mpi ve nde bo ke kwisa tii kuna bo me kuma awa na kufwa beto ti kusukisa bisalu yonso.
6 Kansi Bayuda yina vandaka kuzinga na kati ya bambeni, bo vandaka kwisa konso ntangu kusonga beto bangindu ya mbi ya bambeni sambu na beto.

Yula:

- *Ntangu bambeni vandaka kunwanisa bo, Bayuda salaka inki ntete?
(Bo sambaka Nzambi na bo.)*

- Bo salaka inki diaka?
(Bo tulaka basentinel, ti bo yimbaka.)
- Keti bo bikaka kisalu ya lupangu?
(Ikele ve. Bo lendaka ve bika kisalu ya bo me zenga kusala.)
- Bayuda ya zingaka na kati ya bambeni, bo salaka inki?
(Bo songaka balukanu yonso ya bambeni vandaka kusolula.)

Bana Kutuba: Repetio Ritimika:

Nehemia me sila kutunga lupangu,
yo yina yandi landaka kisalu,
ti landaka kisalu, ti landaka kisalu.

2.4 Nehemie pesaka Bayuda bima sambu bo kunwana bitumba. Nehemia 4: 7-8

Kutanga:

7 Yo yina mono pesaka bantu bambele ya bitumba, makonga tu babunduki ya tolotolo; mono tulaka bo na Ndonga mutindu vandaka makanda na bo, kuna na nima ya lupangu kisika yo me mana ntete ve.

8 Mono monaka nde bantu ke na boma, ebuna mono tubaka na bambuta na bo, na bazuzi na bo ti na bo yonso nde: “Beno tina bambeni na beto boma ve. Beno yindula mutindu Mfumu Nzambi kele nene ti mutindu Yandi ke pesaka boma, beno nwana sambu na bampangi na beno, bana na beno, bankento na beno ti banzo na beno.”

Yula:

- *Nehemie pesaka Bayuda inki?*
(*Bima ya nwanisa mbeni*)
- *Yandi songaka bo inki?*
(*Vanda na boma ve, kansu bambuka kinene ya Nzambi.*)

Bana Kutuba: Repetio Ritimika: Nehemia me sila kutunga lupangu, yo yina yandi landaka kisalu, ti landaka kisalu, ti landaka kisalu.

2.5 Bambeni monaka nde Bayuda zabaka yonso ya bo yindulaka kusala, ebuna bo vutukaka! 4:9

Bana tuba: (Repetitio ritimika)

Bambeni vutukaka! Bambeni vutukaka!

2.6 Nehemie tulaka bo bima ya kutunga na diboko mosi, ti bima ya kunwana na diboko ya nkaka. 4:11

2.7 Bo panzanaka kusala na bisika mingi na lupangu mbala mosi, kansi kana bo waka mpungi, bo yonso kutana sambu na kunwanisa mbeni. Ebuna Nehemia landaka kaka kusala bonso yandi me sila. Nehemia 4:13-14 & 16-20

Bana Kutuba: Repetio Ritimika: Nehemia me sila kutunga lupangu, yo yina yandi landaka kusalu, ti landaka kusalu, ti landaka kusalu.

2.8 Bu yandi vandaka penepene kumanisa, bambeni mekaka kukusa yandi, kansi kieleka bo zolaka kupesa yandi mpasi. Nehemia 6:1-2

Kutanga:

6:2 Yo yina Sanabalati ti Geshemi tindaka mono ndinga nde mono kwenda kukutana na bo na bwala mosi na nseke ya Ono. Yina vandaka mayele na bo na kusala mono mbi.

Yula:

- Kana Nehemia kwendaka kutana ti bambeni yai Sanabalati ti Geshemi, bo yindulaka kusala yandi inki?
(Kusala yandi mbi.)

2.9 Nehemia buyaka nde bambeni kukanga yandi. Yandi vutulaka nde yandi vandaka kusala kusalu mosi ya nene, ebuna yandi lendaka ve kukwisa. Nehemia 6:3

Kutanga:

6:3a Mono tindilaka bo ndinga nde: “Mono ke sala kusalu mosi ya mfunu, mono lenda kwisa kuna ve.”

2.10 Mbala TANU bambeni mekaka kubinga Nehemia sambu bo kukanga yandi.

Nehemia 6:5

Bana Kutuba: Repetito Ritimika ti Bageste:

(Bana tuba bonso bambeni ya Nehemia, kutanga mbala 5 misapi na bo: KANGA YANDI!
KANGA YANDI! KANGA YANDI! KANGA YANDI! KANGA YANDI! Na nima bo tuba mbala
5: IKELE VE, IKELE VE, IKELE VE, IKELE VE, IKELE VE!

2.11 Bambeni salaka lukanu sambu na kufwa yandi, kansi yandi buyaka kutina na boma. Yandi landaka kusala mpila yandi silaka. Nehemia 6:10-11

Bana tuba: (*Repetitio ritimika*): “Ve! Mono me sila! Mono lenda tina ve!”

Bana tuba (*Repetio Ritimika*):

*Nehemia me sila kutunga lupangu,
yo yina yandi landaka kisalu,
ti landaka kisalu,
ti landaka kisalu.*

2.13 Nehemia lungisaka nsilulu na yandi, ti yandi manisaka kisalu yina. Nehemia 6:15

Kutanga:

6:15a Na nima ya bilumbu makumi tanu na zole ya kisalu, lupangu manaka . . .

Bana tuba: (*Phrase par phrase, na nima ya longi, na mpila ritimika*)

Nehemie zengaka mbote

Kisalu ya mbote.

Bo kangamaka kaka

Na kisalu ya mbote.

Bo waka ve bambeni

Na kisalu ya mbote.

Bo landaka, ti landaka

Na kisalu ya mbote.

Tii bo lungisaka

Kisalu ya mbote.

Bo tungaka diaka

Bibaka ya bwala!

Nsuka ya Leso: Na nsuka, Nehemia manisaka kusalu, sambu yandi yindulaka mbote na ntwala kusila, ti yandi salaka konso ntangu, ata yandi zolaka, to yandi zolaka ve na moment yina. Yandi twadisaka bantu na yandi kusala mpi. Yandi kudipesaka na kusalu yina. Yandi kangamaka na yo tii na nsuka.

Bana Kutuba: *Repetio Ritimika: Nehemia me sila kutunga lupangu, yo yina yandi landaka kusalu, ti landaka kusalu, ti landaka kusalu.*

Devoir sambu na bakristo:

Nge me sila kusala inki kusalu sesepiyai na luzingu na nge? (Nzo-nkanda, fami, sika nge ke zinga, dibundu. Mbala ya nkaka nge mpi me sila kulanda Yesu.)

Na ntangu ke kwisa, nge fweti sila kusala inki? (Mbala ya nkaka université, kusalu, dibala, fami.)

Nkunga ya kwenda ti leso yai:

*Kana nge me sila
kusala mambu ya mbote,*

*Nge fweti sala yo,
Landa kusala yo.
Nge fweti sala yo,
Landa kusala yo.*

*Yo lenda vanda mpasi
Kansi nge kaka sala yo.*

*Nge fweti sala yo,
Landa kusala yo.
Nge fweti sala yo,
Landa kusala yo.*

Bansaka ya kwenda nzila mosi ti leso yai:

Nsaka “Zonk.”

Yidika bacarte 8. Na konso carte, tula nombre 100-500. Balula carte ti tula mosi ya bangyifula ya revisio ya beto me sonika na nsi. Bana sala ba-equipe zole. Yula bo bangyifula ya bacarte. Ntangu bacarte yonso me mana, equipe ya me zwa bapoint ya kuluta, yo ta nunga.

Yindula: Mbala mingi, balongi sadila ntangu mingi kuyula bana, sambu na nima bo yula, bo kinga mingi, kusosa nani ta pesa mvutu, ata bantu mingi ke na diboko na zulu. Sola mwana nswalu, kukonda kusosa ngolo. Kana mwana yina pesa ve mvutu ya mbote, sola mwana ya nkaka nswalu, kukonda kukinga mingi. Mpidina, nsaka ta baka ntangu mingi ve.

To, kana konso equipe zola kusola mwana kupesa mvutu, bo sala ndonga na luyantiku ya nsaka. Nge yula mwana ya ntete na ndonga yina. Kana yandi zaba ve, yandi vutuka na kiti na yandi.

Cardte 1: 500 points. Ndinga na français sambu na malongi na beto bubuyai kele ___?
(Mvutu: Engagement.)

Carte 2: 400 points. Ndinga na français sambu na contraire ya malongi na beto kele ____?
(Mvutu: Impulsif to irrefléchi)

Carte 3: 300 points. Inki baprobleme to bampasi Nehemia kuzwaka na kutunga diaka lupangu na lweka ya Yerusalemi?

(Mvutu: Bambeni nwanisaka yandi, bo sekaka yandi ti saulaka yandi, bantu mekaka kukusa yandi ti kupesa yandi mpasi, ti kukanga yandi.)

Carte 4: 200 points. Inki probleme ya Nehemia kuzwaka lenda pesa nge decouragement? Sambu na inki?

(Mvutu: Kele personel muntu na muntu. Pesa bapoint na konso mwana ya pesa mabanza na yandi.)

Carte 5: 500 points. Kofi kotaka equipe ya science na nzo-nkanda, kansi mbala mingi yandi kwendaka ve ntangu classe vandaka kutana, sambu yandi zolaka kusolula ti banduku na yandi. Yandi landaka mpila yandi silaka, to yandi landaka ve? (Mvutu: Yandi landaka ve. Yandi vandaka impulsif.)

Carte 6: 400 points. Kwame kwelaka nkento ti bo butaka mwana. Kansi ntangu kusalu na yandi manaka, yandi bikisaka fami . Tii bubuyai yandi me vutuka ve. Yandi landaka mpila yandi silaka, to yandi landaka ve? (Yandi landaka ve. Yandi vandaka impulsif.)

Carte 7: 300 points. Yaa salaka devoir na yandi konso lumbu, yandi waka mbote na kati ya classe, ti yandi longukaka mbote ti salaka revisio ya ngolo. Yandi landaka mpila yandi silaka, to

yandi landaka ve? (Yandi landaka mbote. Yandi vandaka ve impulsif, kansi yandi vandaka engagé.

Carte 8: 200 points. Marie kotaka na chorale, ebuna yandi kwisaka konso ntangu na pratike, ti yandi kwisaka na ntangu mosi ya mbote. Yandi landaka mpila yandi silaka, to ve? (Yandi landaka mbote. Yandi vandaka engagé.

Kubinga bana na Yesu:

Keti nge me sila kulanda Yesu? Ketu nge me baka engagement ti Yandi? Ketu nge ke landa kusala yina ya nge me sila? Kana nge me sila ntete ve kulanda Yesu, nge lenda binga Yandi bubuyai. Na ntima na nge yonso, songa Yandi nde nge kwikila Yandi bonso Mwana ya Nzambi ti Mvulusi. Binga Yandi kuvulusa nge sesepiyai. Sila Yandi nde nge ta landa Yandi tii na nsuka ya moyo na nge. Yandi ta pesa nge moyo ya mvu ya mvu. Yandi ta kitula nge mwana na Yandi.

Kana nge me binga Yandi bubu mbala ya ntete, to kana nge ke sosa lusadisus na mambu yina, kwisa na mono na nima ya classe. Beto lenda sadisa nge, ti beto ta yangalala ti nge kana nge me baka engagement ti Yesu bubuyai.

===

NSUKA YA LESO 1

===

Leso ya Kuwakana ya Mpa: Ntumwa Paulo zengaka nde yandi fweti kwenda na Yerusalemi

Leso ke monika na: *Bisalu: 20:22-23 & 36-37, 21:10, 15, & 27-33, 22:21*

Leso na nkufi yonso:

Ntumwa Paulo monaka de Mpeve ya Nzambi vandaka kubenda yandi kukwenda na Yerusalemi kusala nkinsi mosi, ata kukwenda vandaka ya kingonsa mingi. Na nsuka, yandi kwendaka ti bambeni kangaka yandi. Bo bulaka yandi ti tulaka yandi na boloko, kansi ntangu yina, yandi monaka occasio mingi kuzabisa nsangu ya Yesu na bamfumu.

Kikuma ya Leso:

Na nsuka ya lesa yai, bana ta zaba nde mpila Paulo zengaka mbote na ntima kusala yina ya Nzambi songaka yandi, ata na ntangu ya mpasi, kiteso mosi mpi beto fweti zenga kusala yina ya Nzambi songa beto. Beto sala mpidina ata bampasi mingi kuvanda na nzila, ebuna beto landa kusala yina ya beto me sila.

Kuyantika Leso:

Nge ta sala inki kana nge mona nde Nzambi ikele kutwadisa nge kuzenga kusala mambu mosi, kansi yo vandaka kingonsa mingi? Kana bo songaka nge na ntwala nde mambu ya Yandi vandaka kulomba, yo ta natila nge mpasi? Keti nge ta ndima kaka kulemfuka na Yandi? Ntumwa Paulo vandaka na situatio mutindu yina. Beto tala histoire na yandi na mukanda ya Bisalu na Kuwakana ya Mpa. Beto tala yo, ti beto ta mona inki yandi salaka. Beto yantika na Bisalu kapu 20.

Mambu ya nene na lesa yai na bandambu 5:

- 1. Ntumwa Paulo yindulaka mbote, ebuna yandi kanaka nde yandi fweti kwenda kusala Nkinsi ya Pantecoti na bwala Yerusalemi. Bisalu 20:16**

Kutanga:

Paulo kanaka na ntima na yandi na kuluta na lweka fioti sambu na kukuma na bwala Efezo ve, mbaimbai yandi ta vidisa ntangu mingi na provense ya Azia. Yandi vandaka kwenda nswalu sambu na kwenda kukuma na bwala Yerusalemi na kilumbu ya Nkinsi ya Pantekoti, kana mpila ikele. Bisalu 20:16

Kuyula:

- Inki Ntumwa Paulo kanaka na ntima?

(Kukuma na bwala Yeruzalemi na ntangu ya mbote sambu na kusala Nkinsi ya Pantekoti.)

Kukina ti kuyimba kusonga inki me salama:

Paulo kanaka na ntima
Kukwenda na Yerusalemi
Sambu na Nkinsi ya Pantekoti.

2. Paulo zengaka nde yandi fweti kwenda, ata yandi bakisaka nde yandi lenda kufwa kuna. Bisalu 20:22-23 & 36-38.

Kutanga: *Bisalu 20:22-23*

20:22 Ntangu yai mono ke kwenda na Yeruzalemi, sambu Mpeve ya Nzambi ke songa mono na kwenda, kansi mono zaba ve kana nki mambu ta bwila mono kuna.

23 Ke na mambu mosi kaka ya mono zaba nde na konso bwala Mpeve ya Nzambi ke zabisa mono nde boloko ti bampasi ke vingila mono.

20:36 Ntangu yandi tubaka mpidina imene, yandi fukamaka ti bo yonso (bantwadisi ya bakristo ya Efezo) sambu na kusamba Nzambi.

37 Bo yonso vandaka kudila, bo vandaka kubwila Paulo na nkingu sambu na kupesa yandi beze.

38 Bo vandaka kumona mawa mingi sambu na mambu yina ya yandi tubaka nde: "Beno ta mona ilungi na mono diaka ve." Ebuna bo kwendaka kubika yandi na maswa.

Kuyula:

- Nani songaka Paulo kukwenda na Yerusalemi?
(Mpeve ya Nzambi songaka yandi.)
- Bakristo na konso zabisa Paulo nde inki vandaka kuingila yandi kuna?
(Boloko ti bampasi vandaka kuingila yandi.)
- Yandi solulaka ti nani na mbala ya nsuka?

(Bantwadisi ya dibundu ya Efezo)

- Bo salaka inki na nima Paulo me solula ti bo?

(Bo me dila ti bo me pesa yandi beze.)

Kusonga inki me salama na theatre:

Bana yonso na kimvuka sala bonso bo kele bambuta ya dibundu ke pesa Paulo kwenda mbote.

Bana tuba: Repetitio ritimika:

Paul zengaka kulemfuka na Nzambi, ata mpasi kwisa, ata lufwa kwisa.

3. Agabusi ti bantu ya nkaka bondilaka Paula kukwenda ve sambu Nzambi me songa bo nde kuna, bambeni ya kanga yandi bansinga. Bisalu 21:10-13

Kutanga:

21:10 Ntangu beto vandaka kuna bilumbu kana ikwa, profete mosi zina na yandi Agabusi, yandi katukaka na ntoto ya Yudea, yandi kwisaka kukuma.

11 Yandi kwisaka kutala beto, ebuna yandi bakaka mukaba ya Paulo, yandi kudikangaka yo na maboko ti na makulu, yandi tubaka nde, "Tala mambu yai ya Mpeve ya Nzambi ke tuba: Munkwa-mukabu yai, Bayuda ta kanga yandi mutindu yai na Yeruzalemi, ebuna bo ta pesa yandi na maboko ya bamimpani."

12 Ntangu beto waka mambu yina, beto ti bantu ya Sezarea, beto bondilaka Paulo na kwenda na Yeruzalemi ve.

13 Kansi Paulo yulaka beto nde: "Sambu na nki beno ke dila? Sambu na nki beno ke dila? Sambu na nki beno ke zola pesa mono mpasi na ntima? Mono kele ya kuyilama sambu bo kwenda kukanga mono, bo kwenda kufwa mono na Yeruzalemi sambu na Mfumu Yesu."

Kuyula:

- Nani songaka Paulo kukwenda ve?

(Agabusi ti baprofete ya naka.)

- **Bo tubaka nde inki ta salama kuna?**

(Bo ta kanda yandi kuna.)

Bana songa inki me salama na theatre:

Demi ya bana sala bonso bo kele baprofeti, ti demi sala bonso bo kele Paulo. Bo balula sambu bo kele face à face. “Baprofeti” sala bonso bo ke kanga maboko ti makulu. Bo songa “Paulo” nde, “Bo ta kanga nge na Yerusalemi.” Paulo vutula nde, “Mambu ve. Mono me yilama kukwenda kaka.”

Bana tuba: Repetitio ritimika:

Paul zengaka kulemfuka na Nzambi, ata inki kwisa, ata inki kwisa.

4. Paulo landaka kaka kusala yina ya yandi me zenga. Bisalu 21:15

Kutanga:

*Na nima ya bilumbu yina, beto yilamaka, ebuna beto kwendaka na Yerusalemi.
(Bisalu 21:15)*

Kuyula:

- Ata Paulo zabaka nde bampasi vandaka kuingila yandi, yandi salaka inki?

(Yandi ti equipe na yandi, bo kwendaka kaka na Yerusalemi.)

Yimba nkunga yai ya kwenda nzila mosi ti lesa yai:

ZENGA MBOTE, SALA, LANDA

Zenga mbote

Inki nge ta sala

Ebuna landa

Mpila nge me zenga.

Nge fweti sala

Mpila nge me zenga.

Kaka landa

Mpila nge me zenga

5. Na Yerusalemi, bantu tubaka luvunu sambu na Paulo, ebuna bantu mingi mekaka kufwa yandi, bo bulaka yandi ti kangaka yandi na leta. Bisalu 21:27-33, 22:24

Sommaire ya mambu ya salamaka na nima:

Bible ke tuba ve nde Paulo balulaka mabanza na yandi sambu na mambu yai ya kwenda na Yerusalemi. Sambu yandi kwendaka, yandi monaka mpasi, kansi Nzambi pesaka yandi mpi occasion ya kusamuna Nsangu ya Yesu na meso ya bamfumu mingi ya nene, ti na Cezare, Mfumu ya luta nene na Kimfumu ya Roma. Na nsuka, Paulo fwaka na Roma bonso kitemwe ya Yesu. Na kiese yonso, yandi lungisaka mpila yandi me zenga kukwenda na Yerusalemi, ata yo nataka mpasi, ata na nima ya ntangu, yo nataka lufwa na Roma.

Bana tuba: Repetitio ritimika: Paul zengaka kulemfuka na Nzambi, ata mpasi kwisa, ata lufwa kwisa.

Devoir sambu na bakristo:

Sosa bavalontaire tanu. Mosi-mosi, muntu na muntu ta songa ntangu mosi ya bo banza nde yo ta vanda mpasi kusala ti kulungisa yina ya bo me sila. Na nsuka, manisa na lombilu yai:

Longi:

Mfumu, ntangu Nge songa beto, kusala mambu yai
Mfumu, ata nzila ya Nge kele mpasi mingi
Ata beto lembe, ata beto mona mawa
Mfumu ntangu beto kwela ti buta fami

Na nzo-nkanda bubuyai
Na kisalu yonso beto sala
Na dibundu ya nge, Yesu

Bana:

Sadisa beto kusala yina beto me zenga!
Sadisa beto kusala yina beto me zenga!
Sadisa beto kusala yina beto me zenga!
Sadisa beto kusala yina beto me zenga!

Sadisa beto kusala yina beto me zenga!
Sadisa beto kusala yina beto me zenga!
Sadisa beto kusala yina beto me zenga!

Sala diaka mambu yai bonso na Leso ya ntete:

Disongidila ya bandinga

Verse ya kulunguka

Nsaka “Zonk” (sadila bangyifula ya mpa na nsi)

Bangyifula ya Zonk (Nsaka ya Leso 2):

Carte 1: 500 points. Sambu na inki Paulo zengaka nde yandi fweti kwenda na Yerusalemi?
(Mvutu: Yandi waka na ntima nde Nzambi zolaka yandi kukwenda.)

Carte 2: 400 points. Inki mutindu Agabusi songaka Paulo inki ta salamak kuna?
(Mvutu: Yandi kangaka nitu na yandi mosi ti mukabu ya Paulo, ebuna yandi tubaka nde Nzambi me songa yandi nde bantu ta sala mpidina na muntu ya nsinga yina.)

Carte 3: 300 points. Na nima bantu kangaka Paulo na Yerusalemi, yandi monaka mpasi. Kansi inki mambu ya mbote salamaka na ntangu yina?

(Mvutu: Paulo zwaka baoccasio ya kitoko kusamuna Nsangu ya Kristo na bamfumu, ti na Mfumu ya kuluta nene na Roma.)

Carte 4: 200 points. Ee to ve? Paulo fwaka na Yerusalemi.

(Mvutu: Ve. Bo kangaka yandi na Yeruzalemi, kansi yandi fwaka na nima ya bamvula na Roma.)

Carte 5: 500 points. Ee to ve? Kana beto me zenga kulanda Yesu, Nzambi ta kangula nzila nde beto mona mpasi ve.

Mvutu: Ve. Yo kele mutindu yina ve. Paulo zengaka nde yandi ta landa Yesu, ti yandi monaka mpasi. Kansi na kati na yo, Nzambi pesaka yandi privilege bonso kusamuna na bamfumu ya nene ti na Mfumu ya kuluta nene na Roma.)

Carte 6: 400 points. Erik silaka kuvanda evangeliste, ebuna yandi yantikaka kusonga fami ti bampangi na yandi nsangu ya Yesu. Yandi vandaka engage to impulsif?

(Mvutu: Engagé. Yandi yantikaka kusonga nsangu ya Yesu na bantu penepene na yandi.)

Carte 7: 300 points. Yawa silaka nde yandi ta komba salle de classe konso lumbu, kansi yandi salaka yo kaka kana longi bambukisaka yandi. Yandi kele engagé to impulsif?

Mvutu: Impulsif, sambu yandi ke sala konso ntangu ve mpila yandi silaka.

Carte 8: 200 points. Kwesi silaka kusamba konso lumbu sambu na misionere. Yandi vilaka kusala yo mbala mingi, ebuna yandi monaka nde mfunu vandaka ve kusala yo diaka. Yandi kele engagé to impulsif?

Mvutu: Impulsif. Yandi silaka, kansi yandi landaka ve yina ya yandi silaka.

Kubinga bana na Yesu:

Keti nge me sila kulanda Yesu? Ketu nge me baka engagement ti Yandi? Ketu nge ke landa kusala yina ya nge me sila? Kana nge me sila ntete ve kulanda Yesu, nge lenda binga Yandi bubuyai. Na ntima na nge yonso, songa Yandi nde nge kwikila Yandi bonso Mwana ya Nzambi ti Mvulusi. Binga Yandi kuvulusa nge sesepiyai. Sila Yandi nde nge ta landa Yandi tii na nsuka ya moyo na nge. Yandi ta pesa nge moyo ya mvu ya mvu. Yandi ta kitula nge mwana na Yandi.

Kana nge me binga Yandi bubu mbala ya ntete, to kana nge ke sosa lusadisusu na mambu yina, kwisa na mono na nima ya classe. Beto lenda sadisa nge, ti beto ta yangalala ti nge kana nge me baka engagement ti Yesu bubuyai.

===

NSUKA YA LESO 2 TI NSUKA YA BALESO YONSO 2

===

Atasio! Longi, beto na Ministères pour Chaque Enfant, beto kele na kiese mingi kundefisa nge lesu yai sambu na kusadisa nge kulonga bana na bwala na nge ndinga ya Nzambi. Beto zola mpi kusadisa mabundu ya nkaka kubenda bana na bisika ya bo kele, sambu bo mpi kuwa Ndinga ya Nzambi. Beto ke na mpila ve kupesa konso ntangu baleso ya mpa na mabundu yonso, kansi kana nge vutula mukanda yai na Centre de Materiel sika nge me zwa yo, bo ta defisa yo na dibundu ya nkaka, ti na nima na bo, na dibundu ya nkaka, etc. Kana bantu yonso vutula yo na nima bo me sadila yo imene, babwala kiteso ya 20 lenda sadila yo! Keti nge zola nde bantu na babwala 20 ya nkaka mona mbote ya lesu yai? Kaka vutula lesu yai sambu beto lenda defa yo na dibundu ya nkaka. Yai ta sadisa MINGI! Nge kele partenaire ti beto na kisalu yai ya nene. MERCI MINGI ti Nzambi sakumuna nge ngolo!